

Es waer ken leichte Sach zu mir
 Wan's Marik-'aus muesst dort 'weck,
 Mei Herz haenkt dra' as wie'n Klett—
 Es macht mich krank, ich muss in's Bett!
 Ich schlup mich in 'n Eck!!
 O! *move* sel Marik-haus nimmermehr
 Eweck von sellem *Center-Square*.

Un wan's dan so weit komme soet,
 Mit ihre krumme Wege;
 Sie derfe doch d'r Fahneschtock,
 So wenig das die Freiheits-glock,
 Mit *Wandal*-haend a'rege;
 Un wan's alt Marik-haus uns ferlosst,
 Dan muss d'r Fahne an halb-mast.

Dort hot der Dchek die Butter-Gret'
 'S aller erscht mohl g'seene;
 Dort hat'r sie gekarresiert,
 Dort hot sie ihn mit Kaes ferschmiert,
 Sei *Affections* zu *gaine*.
 Sell macht's das er so G'luschte hot,
 For's Marik-haus mittes in d'r Schtadt.

Nord hen sie a'h e'mohl *agreed*,
 Dort reg'lar Karresiere—
 Mittwochs un Samschdags, alle Marik,
 Am Marik-haus do in unserer Schtadt,
 Un a'h for dort Kopliere,
 Weil's *handy* war, grad noch'm Marik,
 Am Marik-haus do in unsere Schtadt.

Nord wie d'r Daag rum kumme ish
 For heire, hot'r g'sad:
 "Nau wann do mich net hawe wit,
 Dan sag's—haw a'h ken rechter Abbedit
 For dich," so hot'r zu're g'sad;
 Nord sagd die Gret', "Sin Fish im See,
 So gut wie do—so hot's noch meh."

Should old Acquaintance be forgot,
 Un *never mind about 'em*,
 D'r Alt *Langsyne* ish noch net dod,
 Er kummt als heer for Gerschte-Brod,
 Er kann net dhu mitout'em;
 So wie's emohl dort war in *Ayre*,
 So isch's a do im *Center-Square*.

Wer dorch den *Center-Square* will geh,
 Der braucht net auserum;
 Un wan'r dorchs alt Marik-haus *march'd*,
 Dan wert'r a'h ken *Toll* *gecharg'd*,
 Nord gebt'r a'h nix drum;
 Es ish net noch so'n freier Blatz
 Wies Marik-haus mittes in der Schtadt.

Es is bei weit d'r *centralscht* Blatz
 In dere ganze Welt;
 Dort isch's wu d'r gross Handel isch,
 In Brod und Fleesh un a'h in Fish,
 Un's bringt a'h gar fiel Geld—
 Ferloss dich druf—jushed grad do heer,
 So ringsrum um den *Center-Square*.

'Em Solomon sei Tempel war
 En artlig schoe Gebaeu,
 Er hot's gebaut fon Zed're-holtz
 Un hot's ferleg'd mit glitz-rich Gold—
 ("Nau wie war sell for high?")
 Doch hot's ken schoene *Pillars* g'hat,
 Wies Marik-haus mit' in unsere Schtadt.

So shoe das sel alt Marik-haus isch.
 Ich egen uf dazu,
 Es fehlt noch eh' Ding an d'r Sach—
 E'n rother Hahne uf'm Dach,
 Un der muss noch dazu;
 Nord wert a'h als die Schtund gekrehd,
 Wanewer das d'r Marik a'geht.

'S isch a'h fiel schoener as' als war—
 Die *Ceiling* neu g'*frescoed*;
 E' *Floor* isch g'legt mit lauter *Bricks*,
 D'r anner mit alt *Lumber* g'*fixt*,
 Un g'legt mit lauter *Board*;
 Sel machts a'h besser for die Ratt,
 Am Marik-haus mittes in d'r Schtadt.

Sie hen noch meh *Improvements* g'macht—
 Ich wees net, hoscht du's g'hoert;
 Se hen die Ratte-loecher g'schtoppt,
 Un's Offe-rohr a'h ausgekloppt,
 Un's Dach a'h shoe *repaired*;
 Sie hen's alt Dach roth a'geschtriche,
 Die Taxbezahler hen's gegliche. (?)

Sel *Furniture* isch fiel zu schoe
 For so'n *exschposed'r* Blatz:
 Bei fierundfertzig Butcher-bloeck,
 Sin a'h ken klenes Hund's-geschleck,
 Un a'h net for die Katz;
 Du seensched doch nau wie fett un glatt,
 Sin Hund un Katz un Marik-haus Ratt?

Ken wunner hof m'r Abbedit
 For em sei *Mutton-chops*;
 For Brodwoerscht, Biefschteaks, Kuddelfleck,
 For Kalbfleesch, Lamm, un Schweineschpeck
 Un ah e' b-i-e-s'l Schnapps;
 Sell isch *about* so's *Bill of Fare*,
 Am Marik-house do im *Center-Square*.